

四庫全書

史部

欽定四庫全書

郡齋讀書志卷四下

宋 晁公武 撰

別集類下下

李復古集一卷

右皇朝李迪復古濮州人少從柳開學為古文開嘗謂其門人張景高弁曰此公輔器也景祐初應進士擢居第一累遷翰林學士拜同中書門下平章事後致仕謚

文定

孫文懿集三十卷

右皇朝孫抃字夢得眉山人六世祖長孺喜藏書貯以樓蜀人號書樓孫天聖中進士甲科累遷知制誥翰林學士承旨後參知政事謚文懿

夏文莊集一百卷

右皇朝夏竦子喬江州德安人以父死事補官舉賢良除光祿丞累擢知制誥仁宗屢欲相之為言者所攻而

寢初封英國公後改封鄭謚文莊貴顯凡四十年天資  
好學自經史百氏陰陽律歷之書無所不通善為文章  
尤長偶儷之語朝廷大典策屢以屬之為詩巧麗皆山  
勢蜂腰斷溪流燕尾分之類其集夏伯孫編次有宋次  
道序

宋景文集一百五十卷

右皇朝宋祁子京開封雍丘人天聖中與其兄庠同舉  
進士奏名第一章獻以為弟不可先兄乃擢庠第一而

以祁為第十當是時兄弟俱以辭賦妙天下號大小宋  
累遷知制誥除翰林學士承旨以文章擅名一時終不  
至大用衆頗惜之張方平為之請謚景文通小學故其  
文多奇字蘇子瞻嘗謂其淵源皆有考奇險或難句世  
以為知言集有出麾小集西川猥彙之類合而為一

田公金巖集兩卷

右皇朝田况字元均嘗登學究進士賢良科終尚書左  
丞嘗知成都聽斷之明蜀人以此張乖崖

林君復集二卷

右皇朝林逋字君復杭州錢塘人少刻志為學結廬隱  
西湖之孤山真宗聞其名詔郡縣常存遇之善行書喜  
為詩其語孤峭澄淡臨終作一絕句云茂陵他日求遺  
藁猶喜曾無封禪書或刻石置之其墓中賜諡曰和靖  
先生集有梅聖俞序

陳亞之集一卷

右皇朝陳亞字亞之惟滑稽喜賦藥名詩任至司封

郎中藥詩者始於唐人張籍有江皋歲暮相逢地黃葉  
霜前半下枝之詩人謂起於亞之實不然也

何聖從廬江文集二十卷刀筆五卷奏議二十

卷

右何郊字聖從成都人仁宗朝為御史諫官擢天章閣  
待制熙寧中以尚書右丞致仕歷漢梓永興河南四帥  
守天資好學殆廢寢食為詩章簡重淳淡有孟東野之  
風其仕臺諫時知無不言頗有直聲鮮于子駿嘗誌其

墓集有李邦直序

富文忠劄子集六卷奏議十二卷

右皇朝富弼彥國河南人天聖八年中制科至和二年  
召拜同中書門下平章事元豐中卒年八十謚文忠其  
為文章辨而不華質而不俚泥以道為之序其畧曰人  
孰不仰公使虜之功上乃拜樞密副使而公力辭至和  
之末請立皇嗣之功人或未聞公於褒進司徒則一命  
而不避公每聞人語及北事便變色若不欲聞者至青



州救災之功平居喜為人道之石介嘗以夔邦方公矣而嚴事王沂公薦士後至將相者多矣而最善劉棻數事皆世所罕知者人曰公於仁宗時言猶雨露也英宗時言猶海潮也神宗時言猶鳳鳴也

歐陽文忠公集八十卷諫垣集八卷

右皇朝歐陽修字永叔吉州人舉進士累遷知制誥夏竦以永叔黨於杜韓范富因以外甥張氏事汚之下開封府治之無狀坐用張氏奩中物市田出知滁州召入

修唐書為翰林學士未幾參知政事蔣之奇言其惟簿  
事連其長子婦吳氏詔詰之奇辭窮坐貶年六十乞致  
仕卒諡文忠博極羣書好學不倦尤以獎進天下士為  
已任延譽慰藉極其力而後已於經術治其大指不求  
異於諸儒與尹洙皆為古學遂為天下宗匠蘇明允以  
其文詞令雍容似李翱切近適當似陸贄而其才亦似  
過此兩人至所作唐書五代史不愧班固劉向也獨議  
濮邸事議者不以為是有蘇子瞻序

劉公是集七十五卷

右皇朝劉敞字原甫袁州人慶厯中舉進士廷試第一  
累遷知制誥出知永興感官妓得驚眩疾力求便郡仁  
宗謂執政曰如敞者豈易得邪賜以新橙五十為人明  
白俊偉自六經百氏下至傳記無所不通為文章尤敏  
膽好摹倣古語句度在西掖時嘗食項揮九制各得其  
體英宗嘗語及原甫韓魏公對以有文學歐陽公曰其  
文章未佳特博學可稱耳

尹師魯集二十卷

右皇朝尹洙字師魯河南人天聖中進士以薦為館閣  
校勘累遷右司諫知渭州兼領涇原路經畧公事爭城  
永洛事為董士廉所訟遣御史就鞠不能得其罪猶貶  
均州監酒師魯內剛而外和與人言必極辨其是非前  
世治亂沿革之變靡不該貫人有疑不能通為指畫講  
說皆釋然自得尤長於春秋文章自唐末卑弱本朝柳  
開始為古學天聖初與穆修大振起之

梅聖俞宛陵集六十卷

右皇朝梅堯臣聖俞宛陵人少以蔭補吏累舉進士輒抑於有司幼習為詩出語已驚人既長學六經仁義之說其為文章簡古純粹然最樂為詩王舉正見而歎曰二百年無此作矣歐陽永叔與之友善其意如韓愈之待郊島云

孫明復睢陽小集十卷

右皇朝孫明復晉州人居泰山深於春秋自石介已下

皆師事之年四十未娶李丞相迪以其弟之子妻之慶  
歷中范文正富鄭公言之于朝除國子監直講嘗對邇  
英閣說詩上欲以為侍講楊安國沮之而寢

石守道集二十卷

右皇朝石介守道兗州奉符人天聖八年登進士第遷  
直集賢院篤學有大志嘗謂時無不可為不在其位則  
行其言雖獲禍至死而不悔其為文章陳古今治亂成  
敗以指切當世無所忌諱作慶歷聖德詩分別邪正專

斥夏竦其後守道死竦因誣以北走契丹請剖棺驗視  
云

石曼卿集一卷

右皇朝石延年曼卿南京宋城人舉進士不中為三班  
奉職改太常寺太祝遷秘閣校理能為詩書甚道麗

蘇才翁集一卷

右皇朝蘇舜元才翁子美兄也工草隸詩章豪麗

蘇子美集十六卷

右皇朝蘇舜欽子美易簡之孫也景祐中進士累遷集賢校理監進奏院坐用故紙錢會客除名慷慨有大志好古文章及廢居蘇州買水石作滄浪亭益讀書發其憤懣於歌詩其體豪放往往驚人又善草書酣醉落筆爭為人所傳翫集歐公為之序

鄭毅夫郎谿集五十卷

右皇朝鄭獬字毅夫安州人少俊異為詩賦有聲廷試第一累遷知制誥入翰林為學士王安石不悅之乘宰



相在告除獬知杭州為文有豪氣峭整無長語與滕達  
道少相善嗜酒落魄無檢操人目之曰滕屠鄭沽云

蘇明允嘉祐集十五卷

右皇朝蘇洵字明允眉山人至和中歐陽永叔得明允  
書二十二篇大愛其文辭以為雖賈誼劉向不過也以  
書獻除校書郎與姚子張同編太常因草禮百卷書方  
成而卒治平史臣謂永叔所獻明允之文甚美然大抵  
兵謀權利機變之言也

蔡君謨集十七卷

右皇朝蔡襄字君謨興化人天聖中舉進士慶曆三年  
知諫院仁宗慨然思治增置諫官四員君謨在選中皇  
祐中知制誥累遷翰林學士權三司使嘗知福泉杭三  
州文章清遒粹美工書為本朝第一殘章繼橐得者珍  
藏之在泉州之日喪叔母在告其僚拱之黃垆燕飲用  
樂君謨怒中以危法後數為拱之所訴

杜師雄詩一卷

右皇朝杜默字師雄徂徠人石介作三豪篇所謂歌之  
豪者蘇子瞻頌陋之

鄭成之集十卷

右皇朝鄭褒字成之閩人登進士第慕韓愈為文陳詒  
為編次其集張景為之序

徐仲車詩一卷

右皇朝徐積字仲車東莞人

邵堯夫擊壤集二十卷

右皇朝邵雍堯夫隱居洛陽熙寧中與常秩同名力辭  
不起遼於易數始為學至二十年不施枕而睡其精如  
此歌詩蓋其餘事亦頗切理盛行于時卒謚康節集自  
為序

張少愚白雲集二十卷

右皇朝張俞字少愚幼通悟於書無不該貫朝廷嘗以  
校書郎徵召表乞授其父隱於岷山之白雲谿凡六被  
召皆不起為文有兩漢風嘗賦洛陽懷古蘇子美見而

歎曰優游感諷意不可盡吾不能也

包孝肅奏議十卷

右皇朝包拯字希仁合肥人天聖五年進士權御史中丞知開封府為人剛嚴聞者憚之雖閭里童稚婦女亦知其名性不苟合未嘗偽色辭以悅人平生無私書不受干請雖故人親黨一皆絕之

司馬文正傳家集八十卷

右皇朝司馬光君實也陝州夏縣人初以父蔭入官年

二十舉進士甲科故相龐籍薦除館閣校理神宗卽位  
擢翰林學士御史中丞後除樞密副使力辭而去元祐  
初拜門下侍郎遷尚書左僕射卒年六十八謚文正好  
學如飢之嗜食於學無所不通音樂律呂天文歷數皆  
極其妙晚節尤好禮其文如金玉穀帛藥石也必有適  
於用無益之文未嘗一語及之集乃公自編次公薨子  
康又沒晁以道得而藏之中更禁錮迨至渡江幸不失  
墜後以授謝克家劉喬得而刻版上之

王介甫臨川集一百三十卷

右皇朝王安石字介甫撫州臨川人慶歷二年進士累  
除知制誥神宗在藩邸見其文異之名為翰林學士熙  
寧三年拜中書門下平章事熙寧七年罷明年再入相  
九年罷卒年六十六謚文公其壻蔡卞謂自先王澤竭  
士習卑陋不知道德性命之理安石奮乎百世之下追  
堯舜三代通乎晝夜陰陽所不能測而入於神著雜說  
數萬言其言與孟軻相上下晚以所學考字畫奇耦橫

直深造天地陰陽造化之理著字說包括萬象與易相  
表裏崇寧初卞之兄京秉政詔配祀文宣王廟近時議  
者謂自紹聖以來學術政事敗壞殘酷貽禍社稷實  
出於安石云

呂獻可章奏二十卷

右皇朝呂誨字獻可洛陽人登進士第熙寧初為御史  
中丞時王安石棄官家居朝野稱其才以為古今少倫  
神宗引參大政衆以為得人獻可獨以為不然居無何



安石棄衆任已多變祖宗專汲汲民財所愛信引拔  
或非其人天下失望獻可屢爭不能得乃抗章曰誤天  
下蒼生必此人上遣使喻解執之愈堅乃出知鄧州溫  
公嘗服其知人誌其墓且序其章奏集云其草存者二  
百八十有九歷觀古人有能得其一二者已可載之史  
籍在獻可蓋不足道也

蒲左丞集十卷

右皇朝蒲宗孟傳正閬州新井人皇祐五年進士曾公

亮薦除館職神宗謂宰相曰宗孟有史才乃同修國史  
入為翰林學士除尚書左丞卒年六十六為人酷暴奢  
侈蘇子瞻嘗規之云一曰慈二曰儉世以為中其膏肓  
之疾

趙懿簡集三十卷

右皇朝趙瞻大觀蓋屋人少善為古文慶曆五年登進  
士第治平中為侍御史論濮邸事及貶元祐中終於同  
知樞密院諡懿簡學春秋著書十卷其他文不皆奇也

鮮于諫議集三卷

右皇朝鮮于侁子駿閬中人景祐中登進士乙科神宗初上書上愛其文以為不減王陶元祐中仕至諫議大夫侁治經術有法論著多出新意晚年為詩與楚詞尤工人以為有屈宋風族姪之武編次有序

楊元素集四十卷

右皇朝楊繪字元素漢州綿竹人幼警敏讀書一過輒誦至老不忘皇祐初擢進士第二人累擢翰林學士沈

存中為三司使暴其所薦王永年事因貶官終於天章閣待制知杭州嘗居無為山號無為子為文立就

曾子固元豐類藁五十卷

右皇朝曾鞏子固南豐人元豐中為中書舍人卒子固師事歐陽永叔早以文章名天下壯年其文慄驚奔放雄渾瓌瑋其自負要似劉向藐視韓愈以下也晚年始在掖垣屬新官制方除目填委占紙肆書初若不經意及屬卓授吏所以本法意原職守為之訓勅者人人不

同瞻裕雅重自成一家歐公門下士多為世顯人議者獨以子固為得其傳猶學浮屠者所謂嫡嗣云

李誠之集三卷

右皇朝李師中字誠之登進士科仁廟時權廣南轉運使終天章閣待制唐子方貶春州誠之嘗有詩送行盛傳一時

孫莘老奏議十卷

右皇朝孫覺字莘老元豐末自秘書少監除右諫議大

夫元祐初遷給事中吏部侍郎莘老素與王介甫善後  
為諫官論新法遂絕

李公擇廬山奏議十七卷

右皇朝李常字公擇早年讀書於廬山熙寧中為諫官  
論青苗法而罷元祐初為御史中丞

孫賢良進卷十卷

右皇朝孫洙字巨源廣陵人歐陽永叔舉洙賢良上策  
論五十篇極論時事元豐中直學士院奉詔作靈津廟

碑上稱洙學術行誼且大用之暴得風緩而卒或云上  
欲復大理獄洙對合旨由是驟進

錢賢良進卷十卷

右皇朝錢公輔字君倚武進人從胡瑗學昭陵未知制  
誥

文與可丹淵集四十卷

右皇朝文同與可蜀人進士高第以文學名操韻高潔  
畫筆尤妙仕至太常博士集賢校理元豐初出守吳興

至宛丘驛忽留不行一旦沐浴冠帶正坐而逝

呂晉伯輞川集五卷奏議十卷

右皇朝呂大忠字晉伯藍田人汲公之兄皇祐中進士  
除檢討樞密院吏房文字為河北轉運判官累遷寶文  
閣直學士晉伯博極羣書為文尚理致有益於用章奏  
皆親為之

呂汲公文錄二十卷文錄掇遺一卷

右皇朝呂大防微仲京兆藍田人皇祐初中進士第哲



宗即位召知制誥翰林學士拜尚書左僕射兼門下侍郎紹聖初責授舒州團練副使循州安置未踰嶺卒大防既拜相常分其俸之半以錄書故所藏甚富其在翰林書命典麗議者謂在元絳之上云

呂和叔誠德集三十卷

右皇朝呂大鈞字和叔嘉祐二年中進士第大防仲弟也終於宣義郎郟延路漕司屬官師張厚之瞻學博聞無所不該其文章非義理不發

呂與叔玉溪集二十五卷玉溪別集一十卷

右皇朝呂大臨字與叔汲公季弟也登進士第嘗歷太學博士秘書省正字從程正叔張厚之學通六經尤精於禮解中庸大學等篇行於世嘗賦詩云學如元凱方成癖辭類相如始近能獨倚聖門無一事願同回也得心齋正叔可之

晁氏新城集十卷

右皇朝族祖新城府君也公諱某字君成早登進士第

為杭州新城令以沒蘇子瞻嘗稱其詩清厚靜深而每篇輒出新意奇語

蘇子瞻東坡前集四十卷後集二十卷奏議十卷內制十卷外制三卷和陶集四卷應詔集十卷

右皇朝蘇軾字子瞻洵之長子也軾生十年其母授以書聞古今成敗輒能語其要比冠學通經史屬文日數千言嘉祐中歐陽永叔考試禮部進士梅聖俞與其事

得其論刑賞以示永叔至驚喜以為異人欲以冠多士  
疑曾子固所為乃寘之第二後以書謝永叔見之語客  
曰老夫當避此人放出一頭地又以直言薦之答策入  
上等英宗在藩邸聞其名欲以唐故事召入翰林宰相  
不可知湖州以表謝上言事者摘其語以謗聞遣官逮  
赴御史獄初子瞻當王安石紛更法度之際見其事不  
便於民賦詩以刺焉言者從而媒孽欲置之死神宗薄  
其過謫置黃州溫公相哲宗累擢中書舍人除翰林學

士承旨紹聖中坐草謫呂惠卿制直書其罪誣以訛謗  
安置惠州徙昌化元符中北還卒於常州初好賈誼陸  
贄書論古今治亂不為空言既謫黃州杜門深居馳騁  
翰墨其文一變平生遇事所為詩騷銘記書檄論議率  
皆過人晚喜陶淵明詩和之幾徧為人英辨奇偉於書  
無所不通所作文章才落筆四海已皆傳誦下至閭閻  
田里外至夷狄莫不知其名門下賓客亦皆一世豪傑  
其處本朝所未有也立朝知無不為世稱其忠義嘗自

比范滂孔融議者不以為過在黃州日自號東坡居士  
世因不呼其名止目之為東坡云

蘇子由樂城集前集五十卷後集二十四卷第

三集十卷應詔集十二卷

右皇朝蘇轍子由洵之次子也年十九中進士第二十  
二舉直言因所問極言得失策入或欲黜之仁宗不許  
曰以直言名人而以直言見弃天下謂我何擢商州推  
官久之其兄以詩得罪從坐謫監筠州酒稅宣仁臨朝

相溫公擢中書舍人代子瞻為翰林學士未幾拜尚書  
左丞紹聖初謫置雷州後北還凡居雷循七年居許十  
六年杜門理舊學於是詩春秋傳老子解古史書皆成  
自謂得聖賢遺意

程伊川集二十卷

右皇朝程頤字正叔珦之子也少與其兄顥從汝南周  
敦實為學元祐初司馬溫公薦于朝自布衣擢崇政殿  
說書未幾罷紹聖中嘗謫涪陵專務談經明道深斥辭

章之學從其游者多知名于世

曾子開曲阜集四十卷奏議十二卷西掖集二

卷內制五十卷

右皇朝曾肇字子開子固之弟也登進士第元祐中為中書舍人元符末再入西掖遂為翰林學士前後歷陳頽宋泰海和金陵真定九郡帥守坐兄子宣貶亦以散官汀州安置崇寧末移台州居京口而終封曲阜侯

黃魯直豫章集三十卷外集十四卷



右皇朝黃庭堅魯直幼警悟讀書五行俱下數過輒憶蘇子瞻嘗見其詩於孫莘老家絕歎以為世久無此作矣因以詩往來會子瞻以詩得罪亦罰金元祐中為校書郎先是秦少游晁無咎張文潛皆以文學遊蘇氏之門至是同入館世號四學士而魯直之詩尤奇世又謂之蘇黃云紹聖初謫戎州嘗因嘲謔忤趙正夫及正夫為相諭部使者以風指摘所作承天院塔記中語以為幸灾謗國遂除名編隸宜州以崇寧四年九月三十日

卒

晁無咎雞肋編七十卷

右皇朝族父吏部公也公諱補之字無咎幼豪邁英爽  
不羣七歲能屬文日誦千言王安石名重天下慎許可  
一見大奇之在杭州作文曰七述敘杭州之山川人物  
之盛麗時蘇子瞻倅杭州亦欲有所賦見其所作數曰  
吾可以閣筆矣子瞻以文章名一時至屈輩行與之交  
由此聲名籍甚舉進士禮部別試第一而考官謂其文

辭近世未有遂以進御神宗曰是深於經可草浮薄元祐中除校書郎紹聖初落職監信州酒後知泗州終于官大觀四年也於文章蓋天性讀書不過一再終身不志自少為文即能追考左氏戰國策太史公班固揚雄劉向屈原宋玉韓愈柳宗元之作促駕而力鞭之務與之齊而後已其凌厲奇卓出於天才非醞釀而成者自韓柳而還蓋不足道也

秦少游淮海集三十卷

右皇朝秦觀少游高郵人登進士第元祐初除校勘黃  
本書籍紹聖初除名編隸橫州遇赦北歸至藤州卒蘇  
子瞻嘗謂李廌曰少游之文如美玉無瑕又琢磨之功  
殆未有出其右者少游亦自言其文銖兩不差但華麗  
為愧耳

張文潛柯山集一百卷

右皇朝張耒文潛譙郡人仕至起居舍人嘗為宣潤汝  
穎充五州守又嘗謫居黃州復州最後居陳以沒元祐

中蘇氏兄弟以文倡天下號長公少公其門人號四學  
士文潛少公之客也諸人多早沒文潛獨後亡故詩文  
傳于世者尤多其於詩文兼長雖同時鮮復其比而晚  
年更喜白樂天詩體多効之云

畢公叔西臺集二十卷

右皇朝畢仲游字公叔蚤登進士第元祐中召天下文  
學之士三人策試翰林院蘇子瞻以公叔為第一除集  
賢校理又表自代云學貫經史才通世務文章精麗論

議有餘自臺郎為憲漕緝有能聲以黨籍終於西京留  
臺集陳叔易為之序

陳無已後山集二十卷

右皇朝陳師道無已彭城人公少以文謁曾南豐一見  
奇之許其必以文著元祐中侍從合薦于朝起為太學  
博士紹聖中以進非科舉而罷建中靖國初入秘書為  
正字以卒為文至多少不中意則焚之存者才十一

臨溪隱居集二十卷

右皇朝魏泰字道輔襄陽人曾布子宣妻之弟也幼邁  
其能屬文嘗從徐禧晚節卜隱漢上人頗言其倚子宣  
之勢為鄉里患苦云

廖明畧竹林集三卷

右皇朝廖正一字明畧元祐中召試館職蘇子瞻在翰  
林見其所對策大奇之俄除正字時黃秦晁張皆子瞻  
門下士號四學士子瞻待之厚每來必命侍妾朝雲取  
密雲龍家人以此知之一日子瞻又取密雲龍家人謂

是四學士窺之乃明畧來謝也紹聖間明畧貶信州玉  
山監稅鬱鬱不得志喪明而沒自號竹林居士

邢敦夫呻吟集一卷

右皇朝邢君實敦夫和叔之子年十四賦明妃引蘇子  
瞻見而稱之由是知名未幾和叔貶隨州敦夫侍行病  
羸嘔血一旦有鈴下老卒驕慢應對不遜敦夫怒而擊  
之無何卒死和叔怒以敦夫屬吏以故疾日侵而天黃  
魯直為之挽云眼看白璧埋黃壤何況人間父子情蓋



隱之也集後有子瞻魯直無咎諸公跋

員逢原三蓮集二十卷

右皇朝員逢原關中人仕至朝議大夫

司馬才仲夏陽集二卷

右皇朝司馬禎字才仲溫公之姪孫元祐初與王常輩  
同中賢良科調錢塘尉而卒喜為宮體詩故世傳其為  
鬼物所祟

司馬才叔逸堂集十卷

右皇朝司馬棧字才叔才仲之弟也登進士第亦嘗應  
賢良以黨錮不召詩雖纖艷比其兄稍莊雅

張浮休畫墁集一百卷奏議十卷

右皇朝張舜民芸叟邠州人慶厯中范仲淹帥邠見其  
文異之用溫公薦為諫官仕至吏部侍郎後羈置房陵  
政和中卒其文豪重有理致而最刻意於詩晚年為樂  
府百餘篇自序稱年踰耳順方敢言詩百世之後必有  
知音者云自號浮休先生

金史目錄卷之二十一  
卷四下  
陳瑩中了齋集三十卷

右皇朝陳瓘瑩中延平人建中靖國初為右司諫嘗移書責曾布及言蔡京與弟卞之姦惡章數十上除名編隸合浦以死靖康初贈諫議大夫自號了翁

陳司諫集二卷

右皇朝陳祐字純益仙井監人登進士第建中靖國初為臺諫與龔夬任伯雨張公望協力彈擊紹聖姦臣後蔡京用事廢斥而沒

張無盡集三十二卷

右皇朝張商英字天覺登第調官峽路章惇察訪巴蜀  
風采傾動西南峽中部使者憂之日夕謀所以待之之  
禮由盡因求辨博之士以備燕談或以天覺姓名告因  
檄召至夔州惇既至杯酒間果以人材為問部使者即  
言之惇令召入天覺不冠服箴中長揖徑就坐左惇負  
氣敢大言天覺輒吐言壓之惇大喜歸而薦於朝由是  
召用元祐中為開封府推官出使河東紹聖初擢御史

大觀四年長星見蔡京罷相乃拜右僕射盡反京之政  
召用元祐遷客天下翕然歸重期年去位靖康初遂與  
司馬溫公范文正公同日降制加贈官爵賜謚文忠疑  
范文正乃忠宣也

晁氏景迂集十二卷

右從父詹事公也諱說之字以道文元公元孫少慕司  
馬溫公為人自號景迂生年未三十蘇子瞻以著述科  
薦之元符中上書居邪中等博極羣書通六經尤精於

易傳邵堯夫之學著太極傳指紳高其節行嘗守成州  
時民訴歲旱公以為十分盡蠲其稅轉運使大怒督責  
甚峻因丐老而歸靖康初以著作郎召遷秘書監免試  
除中書舍人兼太子詹事俄以論不合去建炎初終於  
徽猷閣待制

晁氏崇福集三十五卷四六集十五卷

右從父崇福公也諱詠之字之道以道弟也登進士第  
又中宏詞第一元符末上書居邪等廢斥二十年以朝

請郎奉祠崇福宮而終天才英特為文章立成明潤密  
緻世以為宜在北門西掖云

晁氏封丘集二十卷

右世父封丘府君也諱某字伯宇鑠廳中進士第黃魯  
直嘗薦之於蘇子瞻云晁伯宇謹厚守文元家法從游  
多長者其文已能如此年蓋未二十也願子瞻一語教  
戒之子瞻荅云晁伯宇詩騷細看甚奇麗信乎其家之  
多異材也雖然凡文至足之餘溢為奇偉今晁君文涉

奇似太早可作朋友切磋之語以告之非謂其諱也恐傷其邁往之氣耳後坎壞終身卒官封丘丞

唐子西集十卷

右皇朝唐庚字子西眉山人登進士第早受知於張夫覺天覺為相擢京畿提舉常平且欲用為諫官天覺去位後言者謂子西嘗宣言有一網打盡之語貶惠州大觀五年會赦北歸

韓子蒼集三卷

欽定四庫全書

韓子蒼集三卷

三

右皇朝韓駒子蒼仙井人政和初詣闕上書持命以官累擢中書舍人權直學士院王甫嘗命子蒼詠其家藏太一真人圖詩成傳一時宣和廷臣獨以能詩稱云

劉巨濟前溪集五卷

右皇朝劉涇字巨濟蜀人終于太學博士為文頗奇怪

崔德符婆娑集三十卷

右皇朝崔鷗字德符彘中進士第元符末上書入邪等

廢斥幾三十年靖康初召為右正言居無何感疾卒其

為文最長於詩清婉數腴有唐人風

李元應跨鼇集五十卷

右皇朝李新字元應仙井人早登進士第劉涇嘗薦於蘇子瞻命賦墨竹口占一絕立就坐元符末上書奪官謫置遂州流落終身跨鼇仙井山名也

王履道初寮集十卷內制十八卷外制八卷

右皇朝王安中履道真定人政和中有密薦於上者自

盛大名倉累擢掌內外制後拜太保鎮燕山建炎初貶

欽定四庫全書

王履道初寮集十卷

五

象州為文瑰奇高妙最長於制誥李邴入翰林嘗請於上以方今詞林之式上首尾舉履道之名自號初寮先生

呂居仁集十卷

右皇朝呂本中字居仁好問右丞之長子靖康初權尚書郎紹興中賜進士第除右史遷中書舍人已而落職奉祠少學黃山谷為詩嘗作江西宗派圖行于世

陳參政簡齋集二十卷



右皇朝陳與義去非汝州葉縣人中進士第宣和中徽宗見其所賦墨梅詩喜之遂登冊府建炎中掌內外制拜參知政事以卒晚年詩尤工周葵得其家所藏五百餘篇刊行之號簡齋集

胡承公集十卷資古紹志集十卷

右皇朝胡世將字承公中進士科早受知於晁無咎建炎南渡嘗直學士院終於資政殿學士川陝宣撫使為文敏瞻溫雅掌書命頗有能聲喜聚金石刻劾歐公集

古錄為資古紹志集序云以成其先人之志故以紹志  
目其書

參寥集十二卷

右皇朝僧道潛自號參寥子與蘇子瞻秦少游為詩友  
其詩清麗不類浮屠語

洪覺範筠溪集十卷

右皇朝僧惠洪覺範姓喻氏高安人少孤能緝文張天  
覺聞其名請住峽州天寧寺以為今世融肇也未幾坐

累民之及天覺當國復度為僧易名德洪數延入府中  
及天覺去位制獄窮治其傳達言語於鄆天信竄海南  
島上後北歸建炎中卒著書數萬言如林間錄僧寶傳  
冷齋夜話之類皆行于世然多夸誕人莫之信云

饒德操集一卷

右皇朝饒節字德操曾布之客也性剛峻晚與布論不  
合因弃去祝髮為浮屠在襄漢間聲望甚重云

李易安集十二卷

右皇朝李氏格非之女先嫁趙誠之有才藻名其舅正夫相徽宗朝李氏嘗獻詩曰炙手可熱心可寒然無檢操晚節流落江湖間以卒

詹玠將歸集一卷

右未詳何人有題林逋隱居詩當是昭陵時人也

趙韓王集三卷

右皇朝趙普字平則薊州人其父遷洛陽占籍焉乾德中代范質為平章事太平興國六年及端拱初三入相

薨封真定王諡忠獻卒年七十一普初無學術太宗勉  
之晚年頗該博

范蜀公集十卷

右皇朝范鎮字景仁成都人舉進士為禮部第一仁宗  
朝知諫院後言王安石新法不便乞致仕歸潁昌元祐  
初詔召不起封蜀郡公年八十一諡忠文

黃虞部詩一卷

右皇朝黃觀昭陵時嘗將漕成都

全宋文卷之四  
長四下  
呂吉甫集二十卷

右皇朝呂惠卿字吉甫閩人王安石執政擢參知政事  
元祐初謫知福州紹聖後累領藩鎮有莊子解為文長  
於表奏

張橫渠崇文集十卷

右皇朝張載字厚之京師人後居鳳翔之橫渠鎮學者  
稱曰橫渠先生呂晦叔薦之於朝命校書崇文未幾詔  
按獄浙東既歸卒

馭臣鑒古二十卷

右皇朝鄧綰所著綰元豐中為中丞所獻書也未幾坐操心頗僻賦性姦回論事薦人不循分守貶

余氏至言十八篇

右皇朝余安行字仲勉鄱陽人少受知于彭汝礪年八十餘著此書自謂有得于中庸也東南學者多宗之

河間公奏議十卷

右皇朝朱光庭元祐中為諫官時所論事也

汲世論一卷

右未詳何人所著多稱元祐間事且喜論兵疑呂氏書也凡十門

陳叔易詩二十卷

右皇朝陳恬字叔易堯叟裔孫

藏寂軒文藁

右皇朝董闕字闕襄陽人

趙延持盈要論



右皇朝趙延宣和初任合州石照縣丞日所上

汪彥章集十卷

右皇朝汪藻字彥章嘗為翰林學士

詩苑類格三卷

右皇朝李叔撰寶元三年豫王出閣淑為王子傳因纂成此書上之述古賢作詩體格總九十目

韓文辨證八卷

右皇朝洪興祖討論韓愈詩文推考其根源因以訂正

其訛繆頗為該洽云

藝圃折衷六卷

右皇朝鄭厚莆陽人紹興中舉進士第一坐臺評廢于家

總集類

李善注文選六十卷

右梁昭明太子蕭統纂前有序具述其所作之意蓋選漢迄梁諸家所著賦詩騷七詔策令教冊秀才文表上

書啟殫事牋記書移檄難對問議論序頌贊符命史論  
連珠銘箴誄哀策碑誌行狀弔祭文類輯之為三十卷  
竇常謂統著文選以何遜在世不錄其文蓋其人既往  
而後其文尅定然所錄皆前人作也唐李善集注析為  
六十卷善高宗時為弘文學士博學經史百家無不備  
覽而無文時人謂之書簞初為輯注博引經史釋事而  
忘其義書成上進問其子邕邕無言善曰非耶爾當正  
之於是邕更加以義釋解精於五臣今釋事加義者兩

存焉蘇子瞻嘗讀善注而嘉之故近世復行

五臣注文選三十卷

右唐呂延祚集注延祚以李善上引經史不釋述作意  
義集呂延濟劉良張詵呂珣李周翰五人注延祚不與  
焉復為三十卷開元六年延祚上之名曰五臣注

唐文粹一百卷

右皇朝姚鉉寶臣編鉉廬州人太平興國初進士文辭  
敏麗善書札藏書至多頗有異本累遷兩浙漕課吏寫

書采唐世文章分門編類初為五十卷後復增廣之為薛映倚其事奪官斥連州卒後其子以其書上獻詔藏內府命以一官

古樂府十卷并樂府古題要解兩卷

右唐吳兢纂雜采漢魏以來古樂府詞凡十卷又於傳記及諸家文集中采樂府所起本義以釋解古題云

玉臺新詠十卷

右陳徐陵纂唐李康成云昔陵在梁世父子俱事東朝

特見優遇時承平好文雅尚宮體故采西漢以來詞人所著樂府艷詩以備諷覽且為之序

玉臺後集十卷

右唐李康成采梁蕭子範迄唐張赴二百九人所著樂府歌詩六百七十首以續陵序編謂名登前集者今並不錄唯庾信徐陵仕周陳既為異代理不可遺云

續古今詩苑英華集十卷

右唐僧惠淨撰輯梁武帝大同年中會三教編至唐劉

孝孫成臯望河之作凡一百五十四人歌詩五百四十八篇孝孫為之序

珠英學士集五卷

右唐武后朝詔武三思等修三教珠英一千三百卷預修書者凡四十七人崔融編集其所賦詩各題爵里以官班為次融為之序

麗則集五卷

右唐李氏撰不著名集文選以後至唐開元詞人詩凡

三百二十首分門編類貞元中鄭餘慶為序

中興閒氣集三卷

右唐高仲武輯至德迄大厯中錢起以下二十六人詩  
自為序以天寶之亂述作中廢至德中興風雅復振故  
以名仍品藻衆作著之於前云或又題孟彥深纂

南薰集三卷

右唐竇常撰集韓翃至皎然三十人約三百六十篇凡  
三卷其序云欲勒上中下則近於褒貶題一二三則有



有等衰故以西掖南宮外臺為目人各系名系贊

本事詩一卷

右唐孟棻撰纂歷代詞人緣情感事之詩敘其本事凡七類

續本事詩二卷

右偽吳處常子撰未詳其人自有序云比覽孟初中本事詩輒搜篋中所有依前題七章類而編之然皆唐人詩也

斷金集一卷

右唐令狐楚韓琪與李逢吉酬唱詩什開成初裴夷直序之

漢上題襟集十卷

右唐段成式輯其與溫庭筠余知古酬和詩筆牋題

松陵集十卷

右唐皮日休與陸龜蒙酬唱詩凡六百五十八首龜蒙編次之日休為之序松陵者平江地名也

西崑酬唱集二卷

右皇朝楊億劉筠李宗諤晁某錢惟演及當時同館十  
五人唱和詩凡二百四十七章前有億序

唐宋類詩二十卷

右唐朝僧仁贊序稱羅唐兩士所編而不載其名分類  
編次唐及本朝祥符已前名人詩

唐百家詩選二十卷

右皇朝宋敏求次道編次道為三司判官嘗取其家所

藏唐人一百八家詩選擇其佳者凡一千二百四十六首為一編王介甫觀之因再有所去取且題云欲觀唐詩者觀此足矣世遂以為介甫所纂

寶刻叢章三十卷

右皇朝宋敏求次道編次道聚天下古人詩歌石刻凡一千一百三十篇多有別集中所逸者以其相附近者相從又次以歲月先後王益柔為之序云文章難能者莫如詩凡刻之金石者則必其自以為得或作於人所

愛重者故多有清新瓌麗之語覽者其深究焉

歲時雜詠二十卷

右皇朝宋綬編宣獻公昔在中書第三閣手編古詩及  
魏晉迄唐人歲時章什一千五百有六釐為十八卷今  
溢為二十卷矣

仕塗必用集二十一卷

右皇朝祝熙載編本朝楊劉以後諸公表啟為一編

聖紹堯章集十卷

右皇朝李文友編靖康末至紹興十年赦書詔旨

丹陽類稿十卷

右皇朝曾旼編丹陽今潤州春秋曰朱方秦曰丹徒孫  
權改名京口東晉僑立州郡至宋齊陳曰東海獨梁曰  
蘭陵而皆以徐州稱之隋始定今名唐以建康諸邑隸  
焉更為丹陽郡元豐中旼守官于其地因采諸家之集  
始自東漢終於南唐凡得歌詩賦贊五百餘篇

雲臺編六卷

右皇朝耿思柔纂華州雲臺觀古今君臣所題詩什

清才集十卷

右皇朝劉禹卿編輯古今題劍門詩什銘賦蒲逢為之序

瑤池新集一卷

右唐蔡省風集唐世能詩婦人李秀蘭至程長文二十三人詩什一百十五首各為小序冠于其前且總為序其畧云世叔之婦修史屬文皇甫之妻抱忠善隸蘇氏

雅於回紉蘭英擅於宮掖晉紀道蘊之辨漢尚文姬之辭况今文明之盛乎

九僧詩集一卷

右皇朝僧希畫保暹文兆行肇簡長惟鳳惠業牢昭懷古也陳充為序凡一百十篇歐公曰進士許洞因會九僧分題出一紙約曰不得犯一字其字乃山水風雲竹石花草雪霜星日禽鳥之類於是諸僧皆閣筆此本出李夷中家其詩可稱者甚多惜乎歐公不盡見之許洞



之約雖足以困諸僧然論詩者政不當爾蓋詩多識鳥  
獸草木之名而楚辭亦寓意於颺風雲霓如池塘生春  
草窓間列遠岫天際識歸舟雲中辨江樹蟬噪林逾靜  
鳥鳴山更幽庭草無人隨意綠宮漏出花逢楓落吳江  
冷空梁落燕泥微雲淡河漢疎雨滴梧桐殘星幾點鴈  
橫塞長笛一聲人倚樓雞聲茅店月人跡板橋霜之類  
莫不犯之若使諸公與許洞分題亦須閣筆矧其下者

哉

聖宋文粹三十卷

右不題撰人輯慶厯間羣公詩文劉牧王通之徒皆在  
其選

宋文海一百二十卷

右皇朝江旼編輯本朝諸公所著賦詩表啟書論說述  
議記序傳文贊頌銘碑制詔疏詞誌挽祭禱文凡三十  
八門雖頗該博而去取無法

皇宋詩選五十七卷

右皇朝曾慥魯公裔孫守贛州帥荆渚日選本朝自寇萊公已次至僧璉二百餘家詩序云博采旁搜拔尤取穎悉表而出焉

政和文選二十卷

右政和中或編元豐以後人詩文千餘篇徐禧席旦其知名者也


西漢文類

右唐柳宗直撰其兄宗元嘗為之序至皇朝其書亡陶

欽定四庫全書

卷四下

氏者重編纂成之



郡齋讀書志卷四下